

No. Soalan: 26
PR-1352-L01577

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : **JAWAB LISAN**

DARIPADA : **DATO' KAMARUDDIN JAFFAR**
[TUMPAT]

TARIKH : **27 JULAI 2017**

SOALAN : **Dato' Kamarudin Bin Jaffar [Tumpat] minta MENTERI LUAR NEGERI menyatakan tindakan Kerajaan terhadap pendirian Kerajaan Myanmar yang enggan mengizin masuk petugas-petugas Pertubuhan Bangsa-bangsa Bersatu (PBB) untuk menyiasat pembunuhan rakyat dan pemusnahan perkampungan Rohingya di negara itu.**

JAWAPAN

Tuan Yang di-Pertua,

Saya mengucapkan terima kasih kepada YB Tumpat atas pertanyaan yang dikemukakan.

Tuan Yang di-Pertua,

2. Isu mengenai etnik Rohingya di Myanmar adalah amat kompleks dan perlu ditangani secara halus. Justeru, pendekatan "*constructive engagement*" adalah lebih berkesan daripada tekanan berterusan kepada Kerajaan Myanmar.
3. Melalui resolusi tahunan Majlis Hak Asasi Manusia Pertubuhan Bangsa-Bangsa Bersatu (MHAM PBB) mengenai situasi hak asasi manusia di Myanmar yang telah dipersetujui bersama (*adopted by consensus*), Mesyuarat Sesi ke-34 MHAM PBB pada 24 Mac 2017, telah mengesyorkan beberapa cadangan termasuk penubuhan satu "*fact finding mission*" (FFM) oleh PBB. Tujuan misi tersebut adalah untuk mengesahkan kesahihan tuduhan pencabulan hak asasi manusia dan penderaan yang dilakukan oleh pihak tentera dan pasukan keselamatan, terutamanya di Rakhine.
4. Dalam hal ini, Kerajaan Malaysia berpandangan bahawa siasatan penindasan terhadap etnik Rohingya seharusnya disiasat oleh mekanisme antarabangsa yang boleh menjalankan tugasnya secara bebas, saksama dan adil. Mekanisme siasatan yang akan dipilih juga hendaklah memastikan proses siasatan mendapat kerjasama negara berkenaan dan seterusnya

boleh membawa pesalah laku ke muka keadilan. Pertimbangan ini adalah berasaskan pendirian Malaysia bahawa isu hak asasi manusia sepatutnya dibincangkan melalui pendekatan yang membina (*constructive engagement*).

5. Pada masa yang sama, Malaysia berpandangan bahawa hal pengeluaran visa kepada orang luar merupakan hak kedaulatan ataupun “sovereign rights” oleh sesebuah negara berdaulat. Justeru itu, keputusan Kerajaan Myanmar untuk tidak membenarkan pasukan penyiasat PBB membuat siasatan di Rakhine perlu dihormati.

Tuan Yang di-Pertua,

6. Sebagai negara anggota ASEAN dan negara jiran yang prihatin, Malaysia akan terus menekankan kepada Kerajaan Myanmar untuk menangani punca-punca masalah (root causes) dalam isu penindasan etnik Rohingya di Rakhine.

7. Malaysia juga akan terus menggunakan platform antarabangsa terutamanya di peringkat OIC untuk membangkitkan isu etnik Rohingya sebagai usaha mendesak Kerajaan Myanmar untuk mengambil langkah-langkah sewajarnya bagi menghentikan kekejaman dan penindasan ke atas etnik tersebut.

8. Pada masa yang sama, masyarakat antarabangsa perlu meningkatkan kerjasama dengan Myanmar dalam mencari jalan penyelesaian jangka panjang. Adalah diyakini bahawa isu ini dapat ditangani dengan lebih baik sekiranya sokongan masyarakat antarabangsa melalui

perundingan atau dialog dapat dilaksanakan secara konsisten dengan pihak Myanmar.

Sekian, terima kasih.